


## SI JESUS ANG ANAK NG TAO



**Sa Araling Ito'y Pag-aaralan Mo**

**Ang Pagkakatawang-tao**  
 Isinilang ng isang dalaga  
 Limitasyon bilang tao  
 Sakdal na buhay

**Layunin ng Pagkakatawang-tao**  
 Kapahayagan  
 Paghahanda  
 Pagpalit  
 Pamamagitan

Anak ng Tao ang parang paboritong tawag ni Jesus sa Kanyang sarili. Ginamit Niya ito nang 79 na ulit sa mga Ebanghelyo. Bakit? Ano ang ibig sabihin nito? Ito'y nangungusap sa atin lalo na tungkol sa Kanyang pagkakatawang-*tao* at sa Kanyang misyon bilang kinatawan ng sangkatauhan.

Anak ng Tao ang pangalang mesianiko buhat sa mga hula sa Matandang Tipan. Sa Hebreo ito'y "Ben Adham." Maisasalin itong Anak ni Adan, Anak ng Tao, o Anak ng Sangkatauhan. Ito'y nagbibigay-diin sa apat na bagay tungkol kay Jesus:

1. Si Jesus ay tunay na tao. Hindi isang balatkayo ang Kanyang katawan. Talagang mayroon Siyang likas na pagkatao.
2. Si Jesus na Anak ni Adan, ay binhi ng isang babaing ipinangako kina Adan at Eba — kanilang apo na tatalo kay Satanas.
3. Si Jesus na Anak ni Adan ay kabilang sa buong sangkatauhan. Siya ang Mesias ng lahat, hindi lang ng iisang bansa, panahon, o lugar.
4. Naparito sa lupa si Jesus para sa isang misyong Siya lamang ang makatutupad bilang tunay na kinatawan ng sangkatauhan.

### Pagkakatawang-*tao*

Ang pagkakatawang-*tao* ay salitang galing sa dalawang salita na nasa laman ang ibig sabihin. Naparito sa sanlibutan ang Diyos, na nasa laman ng tao. Si Jesu-Cristong Anak ng Diyos ay Diyos na nagkatawang-*tao* — diyos na nadaramtan ng pagiging tao.

## Isinilang ng Isang Dalaga

Sa anong himala naging Anak ng tao ang Anak ng Diyos? Kailangan ang isang inang tao para maipanganak si Jesus bilang apo ni Adan. Nguni't wala Siyang amang tao. Ang Diyos ang Kanyang Ama. Sa pamamagitan ng himala ng pagsisilang ng isang babae, gaya ng hinulaan ni Isaias, ang Diyos ay namuhay sa gitna ng mga tao at naging katulad nila.

Siniyasat ng manggagamot na si Lucas ang mga katibayan at isinukat niya tungkol sa pagsisilang ni Jesus:

**Lucas 1:26-38.** Ang anghel Gabriel ay sinugo ng Diyos sa Nazaret, Galilea, sa isang dalaga na ang pangala'y Maria. Siya'y nakatakdang i k a s a l kay Jose, isang lalaking buhat sa lipi ni Haring David. Pagla-



pit ng anghel sa kinarorconan ng dalaga, kanyang binati ito. "Matuwa ka! ikaw ay kalugudlugod sa Diyos," wika niya. "Sumasaiyo ang Panginoon!" Nagulumihanan si Maria sa gayong pangungusap, at inisip niya ng mabuti kung ano ang kahulugan niyon. Kaya't sinabi sa kanya ng anghel, "Huwag kang matakot, Maria, sapagka't kinalulugdan ka ng Diyos. Makinig ka! Ikaw ay maglilihi at manganganak ng isang lalaki, at siya'y panganganlan

mong Jesus. Siya'y magiging dakila at tatawaging Anak ng Kataas-taasan. Ibibigay sa kanya ng Panginoong Diyos ang trono ng kanyang amang si David. Maghahari siya sa angkan ni Jacob magpakailanman, at ang kanyang paghahari ay walang hanggan.

"Paanong mangyayari ito, gayong ako'y dalaga?" tanong ni Maria. Sumagot ang anghel, "Bababa sa iyo ang Espiritu Santo, at lililiman ka ng kapangyarihang Kataas-taasan. Kaya't banal ang ipanganganak mo at tatawaging Anak ng Diyos . . ." Sumagot si Maria, "Ako'y alipin ng Panginoon. Mangyari sa akin ang iyong sinabi." At nilisan siya ng anghel.

Sinabi ni Mateo, isa sa mga alagad ni Jesus, ang nangyari nang malaman ng kasintahan ni Maria na ito'y nagdadalantao.

**Mateo 1:19-25.** Isang taong matuwid itong si Jose na kanyang magiging asawa, nguni't ayaw niyang mapahiya si Maria, kaya ipinasya niyang hiwalayan ito nang lihim. Sa-



mantalang iniisip-isip ni Jose ito, napakita sa kanya sa panaginip ang isang anghel ng Panginoon. Sabi nito sa kanya, "Jose, anak ni David, huwag kang matakot na tuluyang pakasalan si Maria, sapagka't siya'y naglihi sa pamamagitan

ng Espiritu Santo. Manganganak siya ng isang lalaki; at ito'y panganganlan mong Jesus sapagka't siya ang magliligtas ng kanyang bayan sa kanilang mga kasalanan. Nangyari ang lahat ng ito upang matupad ang sinabi ng Panginoon sa pamamagitan ng propeta: "Maglilihi ang isang dalaga at manganganak ng isang lalaki. At tatawagin itong Emmanuel" (ang kahuluga'y "Kasama natin ang Diyos.") Nang magising si Jose, sinunod niya ang utos sa kanya ng anghel ng Panginoon; pinakasalan niya si Maria. Nguni't hindi ginalaw ni Jose si Maria hanggang sa naipanganak nito ang isang sanggol na lalaki na pinanganlan niyang Jesus.

Ang pagsasabing naging tao si Jesus ay hindi nangangahulugang ginawa siyang tao, o naputol ang kanyang pagiging Diyos nang siya'y maging tao. Diyos pa rin ang Diyos Anak Bilang Anak ng Tao, isinuot Niya ang bagong likas, ang likas ng tao, at inilakip ito sa likas ng Diyos sa isang kalagayan sa katauhan ni Jesu -Cristo, totoong tao at totoong Diyos. Tinatawag natin itong ang pagkakatawang tao ng Diyos.



+ TAO =





### Ang Gagawin Mo

1. Ano ang isinasaad sa atin ng tawag na Anak ng Tao?
  - .... a) Siya ay "Anak ni Adan," tunay na tao, kinatawan ng sangkatauhan.
  - .... b) Mayroon Siyang amang tao.
  - .... k) Si Adan ang Kanyang ama.
2. Paano naging tao si Jesus? (Pumili ng dalawa)
  - .... a) Siya'y isinilang ni Maria, isang dalaga, at ang Diyos ang Kanyang Ama.
  - .... b) Siya'y may ama't inang tao.
  - .... k) Hindi na Siya Diyos at naging tao lamang.
  - .... d) Inilakip sa Kanyang banal na likas ang katangian ng likas na tao.

### Limitasyon Bilang Tao

Upang maging tunay na tao at ating kinatawan, si Jesus ay natatakdaan ng:

**Katawan at likas ng isang tao**

**Kalagayan ng buhay sa gitna ng mga tao**

**Kakayahang espirituwal para sa lahat.**


*Katawan at likas ng isang tao.* Isinainastabi muna ni Jesus ang imortalidad at nagbihis ng katawan ng taong may kahinaan. Maaari Siyang magkasakit, maghirap, at matatay. Siya'y madalas na nagutom, nauhaw, at napagod. Dumanas Siya ng kalungkutan, kabiguan, pagkaunsiyami, at sakit ng loob. Naranasan Niya ang galak at takot ng isang tao.

*Mga kalagayan ng buhay sa gitna ng mga tao.* Hinubad ng Lumikha ng sansinukob ang Kanyang kapangyarihan at naging isang mahinang sanggol. Ang Pinagmumulan ng lahat ng karunungan at kaalaman ay nag-aral at natutong bumasa, sumulat, at nag-aral ng Salita ng Diyos. Gumawa Siya bilang isang karpintero. Iniwan Niya ang trono sa langit na doon Siya'y sinasamba ng mga anghel, at naging isang alipin — hinamak, pinagtawanan, inusig — ibinigay ang Kanyang buhay sa paglilingkod at pagpapakasakit para sa iba.

*Kakayahang espirituwal para sa lahat.* Ipinakita sa atin ni Jesus ang dapat nating panundan nang iukol ang Kanyang sarili sa kapangyarihang espirituwal at mga paraang para sa atin lahat. Siya'y nanalangin at tinugon ng Diyos ang Kanyang dalangin. Sa Diyos Siya umasa ng lakas at kapangyarihan. Naging tungo Siya sa bahay ng Diyos at nag-aral ng Kanyang Salita. Nang Siya'y tuksuhin ni Satanas para magkasala, sinambit ni Jesus ang mga talata sa Biblia na angkop sa pangyayari. Sinabi Niya sa balana na nangyari ang Kanyang mga himala pagka't gumagawa sa pamamagitan Niya ang Espiritu ng Diyos, at madali ang Kanyang turo — sinabi Niya ang ipinasasabi sa Kanya ng Diyos.

Nang sumulat si Pablo sa mga taga-Filipos, inilarawan niya kung paanong nagkusang magpakababa si Jesus upang maging Tagapagligtas natin at kung paano Siya pinarangalan ng Diyos at pararangalan dahil dito. Basahin natin ang bagong salin upang luminaw ang kahulugan.

**Filipos 2:6-11.** Na bagama't siya'y Diyos hindi nagpilit na manatiling kapantay ng Diyos, bagkus hinubad niya ang lahat ng katangian ng pagka-Diyos, nagkatawang-tao at namuhay na isang alipin. Nang maging tao, siya'y nagpakababa at naging masunurin hanggang kamatayan, oo, hanggang kamatayan sa krus! Kaya naman, siya'y itinampok ng Diyos at binigyan ng pangalang higit sa lahat ng pangalan. Anupa't ang lahat ng nilalang na nasa langit, nasa lupa, at nasa ilalim ng lupa ay maninikluhod at sasamba sa kanya at ipahahayag ng lahat na si Jesu-Cristo ang Panginoon, sa ikararangal ng Diyos Ama.





### Ang Gagawin Mo

3. Ibigay ang tatlong bahagi ng limitasyon sa pagiging tao ni Jesus nang Siya't narito sa lupa.
  - a) .....
  - b) .....
  - k) .....
  
4. Pag-aralan at gawin sa ibaba nito ang balangkas na isinalig sa Filipos 2:6-11.

### Sakdal na Buhay

Si Jesus ay namuhay nang sakdal. Wala Siyang anumang kamalian o kahinaan. Walang makitang pagkakamali sa Kanya ang mga kaaway Niya. Nang lumaki si Jesus, dinanas Niya ang mga tuksong dinaranas ng ibang kabinataan, subali't nanatili Siyang malinis, tapat, taimtim—puspos ng pag-ibig ng Diyos at sa Kanyang kapwa tao.

Kinamuhian ni Jesus ang kasalanan at nagsalita laban dito, nguni't iniibig Niya ang makasalanan. Nakilala Siya bilang kaibigan ng makasalanan. Gayunma'y hindi nila nabago Siya.

Ang sakdal na buhay ni Jesus ay bahagi ng kanyang misyon bilang Anak ng Tao. Bilang kinatawan ng sangkatauhan, tinupad niyang lahat ang kautusan ng Diyos. May karapatan Siya sa lahat ng pagpapalang ipinangako roon sa tumutupad ng kautusan ng Diyos. — buhay na walang hanggan at kaligayahan sa tahanan ng Diyos. Karapat-dapat Siyang maging sakdal na kapalit natin, upang: 1) kunin ang ating kasalanan at mamatay para sa kasalanan natin, at 2) ibigay sa atin ang Kanyang katuwiran (matwid na kaugnayan sa Diyos) at lahat ng pagpapalang pangako sa gaganap ng kautusan ng Diyos.

Sinikap ni Satanas na udyukang magkasala si Jesus at hadlangan Siya sa Kanyang misyon. Nguni't tinanggihang lahat ni Jesus ang mga tukso at isinagawa ang Kanyang misyong magligtas sa atin. Ang Kabutihang ni Jesus ay di lamang negatibo (kawalan ng kasamaan.) Ito'y positibong pagtatalaga sa kalooban ng Diyos. Di lamang Siya tumanggi sa paggawa ng mali — Siya'y nakatalagang gumawa ng tama. Siya ang pag-ibig na nagkatawang-tao


at ikinilos Niya ang pag-ibig na ito.

Nagpasimula ang pangmadlang paglilingkod ni Jesus sa gulang na 30 taon. Itinuro Niya sa mga tao ang tungkol sa Diyos at kung paano magkakaroon ng bahagi sa Kanyang kaharian. Siya ang pinakadakilang Propeta at Guro na nakilala ng sanlibutan. Sa isang hipo o utos, lamang napagaling Niya ang daan-daang may-sakit. Ang mga makasalanang lumapit sa Kanya ay tumanggap ng patawad, kapayapaan, paglilinis ng kasalanan, at kahanga-hangang bagong buhay na tigib ng Kanyang pag-ibig.

**Gawa 10:38.** Ang sinasabi ko'y tungkol kay Jesus na taga-Nazaret. Ipinagkaloob sa kanya ng Diyos ang Espiritu Santo at ang kapangyarihan bilang katunayan na siya nga ang Hinirang. Sapagka't sumasakanya ang Diyos, siya'y gumagawa ng kabutihan at nagpapagaling sa lahat ng pinahihirapan ng diyablo saanman siya pumaroon.

Nanaghili sa Kanya ang mga lider ng relihiyon at ayaw tanggaping Mesias si Jesus. Binintangan Siya nang kabulaanan at ipinapako sa krus (tulad ng hula ni Isaias.) Ipinako nga Siya sa krus na parang karaniwang kriminal, sa gitna ng dalawang kriminal. At ang mga taong Kanyang ililigtas na dahilan ng Kanyang pagparito sa lupa ay Siyang humamak sa Kanya hanggang sa Siya'y mamatay. Sa kabila nito, iniibig pa rin sila ni Jesus at idinalangin:

**Lucas 23:34.** Ama, patawarin mo sila, sapagka't hindi nila nalalaman ang kanilang ginagawa.



Ang sakdal na buhay ni Jesus ay hindi nag-wakas sa libingan. Muli Siyang binuhay ng Diyos Ama nang ikatlong araw. Pagkalipas pa ng 40 araw rito sa lupa, Siya'y nagbalik sa langit; naroon Siya ngayon bilang kinatawan natin. At mula roon, Siya'y babalik sa lupa balang araw upang maghari nang buong payapa at katarungan sa buong sanlibutan.

### Ang Gagawin Mo

5. Paano hinarap ni Jesus ang tukso?
- ..... a) Umiwas Siya sa mga tao upang hindi Siya matukso.
- ..... b) Tinanggihan niya ang tukso at patuloy na gumawa ng mabuti.
- ..... k) Sumuko Siya sa tukso.

6. Ang kabutihan ba ni Jesus ay positibo o negatibo? Ipaliwanag mo.

.....

.....

.....

7. *Isipin mo:* Sa palagay mo kaya, ano ang sukdulang pagsubok at kapahayagan ng sakdal na katangian ni Jesus: Ano ang kabuluhan sa iyo kung si Jesus ay nagkasalanan o namuhay nang sakdal?

### **Layunin ng Pagkakatawang-Tao**

Bakit naging tao ang Diyos? Bakit kumuha Siya ng katawan ng tao at inilakip sa Kanyang banal na likas ang likas ng tao? Bakit kinailangan ang pagkakatawang-tao? Mabubuo natin ang sagot sa apat na salita: 1) Kapahayagan, 2) Paghahanda, 3) Pagpalit, 4) Pamamagitan.

#### **Kapahayagan**

Si Jesus ay nagkatawang-tao upang ipakita sa atin ang Diyos. Nabadya sa Kanya ang katauhan ng Diyos. Makikilala natin ang Diyos kung makikilala natin si Jesus. Pag-aaralan mo pa ang tungkol dito sa darating na mga aralin.

Ang Anak ng Diyos ay naging tao upang ipakita sa atin kung ano ang kahustuhang-gulang ng sakdal. Nakita natin sa sakdal na buhay at katauhan ni Jesus ang panuntunan para sa sangkatauhan, ang maaaring mangyari, ang plano ng Diyos para sa atin. Siya ang huwaran natin. Sinusukat ang ating mga salita, isipan at kilos ayon sa Kanyang pamantayan. Ipinakikita Niya sa atin ang uri ng buhay na matatamo natin kung Siya'y nasa atin at ginawa Niya tayong mga anak ng Diyos.

**Efeso 4:13.** Sa gayon, tayong lahat ay magkakaisa sa pananampalataya at pagkakilala sa Anak ng Diyos at magiging ganap ang ating pagkatao ayon sa pagiging ganap ni Cristo.



Ibinadya rin ng buhay ni Jesus ang mga katangian Niya kaugnay ng Kanyang misyon. Ipinakita ng Kanyang kawalang-kasalanan na Siya'y karapat-dapat na maging Kapalit natin. Pinatutunayan ng Kanyang kapangyarihan, karunungan, at pag-ibig na siya'y karapat-dapat maging Hari natin.

### Ang Gagawin Mo

8. Ibigay ang apat na salitang bumubuo ng layunin ng pagkakatawag-tao:
 

.....

.....
9. Ano ang makikita nating ipinakita o ibinabadya ng buhay ni Jesus?
  - .... a) Kahustuhang-gulang ng sakdal.
  - .... b) Ang likas ng Diyos
  - .... k) Mga katangian para sa Kanyang misyon.
  - .... d) Ang panuntunan ng Diyos para sa atin.
  - .... e) Lahat ng nabanggit sa itaas nito.
10. *Isipin mo:* Basahin ang bawat parirala ng Efeso 4:13 at iangkop sa iyong sarili. Kung si Jesus ang panuntunan ng Diyos para sa atin, gaano kahalaga para sa atin na matutuhan pang lalo ang tungkol sa Kanya? Ano ang pakahulugan natin ng Efeso 4:13? Kung kilala ba natin si Jesus, lalo ba tayong matutulad sa Kanya?

**Paghahanda**

Ang buhay ni Jesus bilang tao ay mahalaga ng paghahanda para sa Kanyang misyon. Ang Kanyang karanasan ang nagbigay sa Kanya ng pagkaunawa sa likas ng tao kaya't nahanda Siyang maging kinatawan natin at Hukom.

Kinakailangang maging isang tao si Jesus para maging Saserdote natin. Nakabahagi Siya ng ating kahinaan. Nauunawaan Niya ang ating mga suliranin. Natutuhan Niya ang halaga ng pagtalima sa pamamagitan ng sarili Niyang paghihirap. Idinalangin ni Jesus ang Kanyang mga alagad nang Siya'y nasa lupa pa. At ngayon, idinadalangin Niya ang ating pangangailangan—tayo'y Kanyang idinadalangin doon sa langit.

**Hebreo 2:17,18.** Kinailangang siya'y matulad sa kanyang mga kapatid sa lahat ng paraan. Sa gayon, siya'y naging isang dakilang saserdote, mahabagin at tapat, na naglilingkod sa Diyos at naghahandog ng hain sa ikapagpapatawad ng mga kasalanan ng tao. Sapagka't siya ma'y nagbata at tinukso, kaya ngayo'y matutulungan niya ang mga tinutukso.

**Hebreo 4:14-16.** Mayroon tayong napakadakilang saserdote na pumasok sa kalangitan sa harapan ng Diyos, walang iba kundi si Jesus na Anak ng Diyos. Ang dakilang saserdote nating ito ay nakauunawa ng ating mga kahinaan sapagka't sa lahat ng paraan'y tinukso siyang tulad natin, nguni't hindi nagkasala. Kaya't huwag na tayong magatubiling lumapit sa trono ng mahabaging Diyos at doo'y kakamtan natin ang habag at kalinga sa panahong kailangan natin ito.

Ang karanasan ni Jesus bilang isang tao'y naging kahandaan Niya upang mamahala sa mga tao. Ang Anak ng tao—ang sakdal na kinatawan ng lahi ni Adan — ang magiging pinuno nito. Siya ang magiging isang Haring sakdal pagka't alam Niya kung ano ang ating kailangan. Tayo'y nauunawaan Niya. At sa-pagka't namatay Siya para sa atin, may karapatan Siyang pamahalaan tayo. Ngayon, Siya ang Hari ng mga tumanggap sa Kanya. Balang araw, pamamahalaan Niya ang sangkatauhan na Kanyang pinagkamatayan.

Daniel 7:13,14. Ako'y nakakita sa pangitain sa gabi, at narito, lumabas na kasama ng mga alapaap sa langit ang isang gaya ng Anak ng Tao, at siya'y naparoon sa matanda sa mga araw, at inilapit nila siya sa harapan niya. At binigyan siya ng kapangyarihan at kaluwalhatian, at isang kaharian, upang lahat ng bayan, bansa, at mga wika ay maglingkod sa kanya: ang kanyang kapangyarihan ay walang hanggan, hindi lilipas, at ang kanyang kaharian ay hindi magigiba.

### Ang Gagawin Mo

11. Ayon sa iyong pagkaalam kay Jesus, ang pagiging tao kaya Niya'y naging sapat na paghahanda nga upang Siya ang maging iyong saserdote at Hari? . . . . .
- Sa paanong paraan? . . . . .
- . . . . .
- . . . . .
- . . . . .

### **Pagpalit**

Si Jesus ay isinilang upang mamatay. Nagkasala ang lahat at hinatulang mamatay magpakaylanman lahat tayo. Ang tanging paraan para maligtas ay ang akuin ng Diyos ang parusa natin. Nguni't hindi Siya maaaring mamatay bilang Diyos. Kaya, Siya'y naging tao upang pumalit sa atin at iligtas tayo sa kasalanan.

Hindi lamang inako ni Jesus ang ating lugar sa krus. Kundi Siya'y nabuhay uli at nag-aalok sa lahat ng tatanggap sa Kanya ng isang lugar sa Kanyang walang hanggang kaharian. Inilakip Niya tayo sa Kanyang sarili upang makabahagi ng lahat ng karapatang taglay Niya bilang Anak ng Diyos.

**Hebreo 2:9-11,13-15.** Subali't alam nating si Jesus, bagama't sandaling panahong pinababa kaysa mga anghel, ay binigyan ng karangalan at kadakilaan dahil sa kanyang pagkamatay. Dahil sa pag-ibig ng Diyos sa atin, niloob niya na si Jesus ay mamatay para sa ating lahat . . . upang makapagdala ng marami sa kaluwalhatian. Si Jesus ang nagpapabanal sa kanila, at ang Ama ng nagpapabanal at ng pinapaging-banal ay iisa. Sabi pa niya, "Naririto ako at ang mga anak na ibinigay sa akin ng Diyos." Yayamang ang mga anak na tinutukoy niya ay tao, naging tao rin si Jesus, tulad nila — na may laman at dugo. Ginawa niya ito upang sa pamamagitan ng kanyang kamatayan ay maigupo niya ang diyablo na siyang may kapangyarihan sa kamatayan. Sa gayon, pinalaya niya ang lahat ng naging alipin habang panahon dahil sa kanilang takot sa kamatayan.

### Ang Gagawin Mo

12. Isulat ang mga parirala mula sa Hebreo 2 na naglalarawan sa pagkakatawang-*tao* at ang layunin nito.

a) Pagkakatawang-*tao*: Si Jesus, bagama't sandaling panahong

---



---

b) Layunin: Dahil sa pag-ibig ng Diyos sa atin, niloob niya na . . . . .  
upang . . . . .  
. . . . .

k) Pagkakatawang-*tao*: Naging . . .  
si Jesus

d) Layunin: Ginawa niya ito upang sa gayon . . . . .  
. . . . .  
. . . . .

Ngayon, salungguhitan mo ang lahat ng salitang tumutukov sa iyo. (Kabilang sa "*tao*" ang mga lalaki, babae, bata.)



### **Pamamagitan**

Si Jesus ay naging tao upang paglapitin ang Diyos at ang tao. Nagkaroon ng di mararaang bangin ang kasalanan sa pagitan ng banal na Diyos at ng taong tiwali, masuwayin. Nguni't ang pag-ibig ng Diyos ang gumawa ng tulay na nag-ugnay sa malaking agwat at pamuling inilapit sa Kanya ang tao. Si Jesus ang naging Tagapamagitan ng isang bagong kasunduan ng Diyos at ng tao.



**Tao**

**1 Timoteo 2:5,6.** Sapagka't iisa ang Diyos, at iisa ang tagapamagitan sa Diyos at sa mga tao, ang taong si Cristo Jesus na nag-handog ng kanyang buhay upang tubusin ang lahat.

Noong panahon ng Bagong Tipan, inaatasan ng hukuman ang isang tagapamagitan upang kumatawan sa taong may pagkakautang at mamahala sa lahat niyang kabuhayan. Ang tagapamagitan ang tumitiyak na nabayaran ang mga pinagkakautangan. Kung hindi sapat na pambayad ang tinatangkilik ng taong iyon, ang tagapamagitan ang siyang nagbabayad.

Kay gandang larawan ni Jesus! Siya ang ating Tagapamagitan sa harapan ng Diyos. Ang Kanyang kamatayan ang sumasaklaw sa lahat nating utang ng kasalanan, at sa kanya tayo'y malaya sa kasalanang naghihiwalay sa atin at sa Diyos. Pinakatulay sa malaking agwat ang Kanyang krus. Binigyan tayo ng bagong likas — ang Kanyang likas — at ginawa tayong mga anak ng Diyos. Sa pamamagitan ng pagkakatawang-tao, tayo'y naabot ni Jesus at naitaas sa lalong mabuting daigdig. Ang Anak ng Diyos ay naging Anak ng Tao, para maging mga anak ng Diyos tayong mga tao.

**Galacia 4:4-5.**...Sinugo ng Diyos ang kanyang Anak. Isinilang siya ng babae, at namuhay sa ilalim ng Kautusan upang palayain ang mga nasa ilalim ng Kautusan. Sa gayon, tayo'y mabibilang na mga anak ng Diyos.

**1 Pedro 3:18.** Sapagka't si Cristo'y namatay para sa inyo; namatay siya dahil sa kasalanan ng lahat — ang walang kasalanan para sa mga makasalanan — upang kayo'y iharap sa Diyos.

Sa buong Bagong Tipan, makikita natin ang mga talatang nagsasaad ng layunin ng Diyos para sa atin at tumutulong upang maunawaan natin ang pagiging Anak ng Tao ni Jesus. Ito'y sinabi ni Jesus sa ilang kataga:

**Lucas 19:10.** Sapagka't naparito ang Anak ng Tao upang hanapin at iligtas ang naligaw.

### Ang Gagawin Mo

13. Isaulo mo ang Lucas 19:10.  
14. Pagtambalin ang nasa kanang salita na inilalarawan sa kaliwa.

- |                           |                      |
|---------------------------|----------------------|
| a) Naging tao ang Diyos   | 1) Pamamagitan       |
| b) Namatay kapalit natin  | 2) Kapahayagan       |
| k) Inilapit tayo sa Diyos | 3) Pagkakatawang-tao |
| d) Huwaran ng tao         | 4) Paghahanda        |
| e) May mga suliranin      | 5) Pagpalit          |

15. Iguhit ang paglalarawan sa pamamagitan ni Jesus.

16. *Isipin mo:* May ibayong kahulugan ba sa iyo ngayon ang katawagang Anak ng Tao kaysa dati? Higit mo bang pinahahalagahan ngayon si Jesus? Nailapit ka ba Niya sa Diyos? Pasalamat mo Siya dahil sa Kanyang pagkakatawang-tao. Ipahayag mo sa Kanya ang iyong mga pangangailangan. Siya ang iyong Kinatawan sa harapan ng Diyos.

Markahan ang iyong mga sagot.

### Ika-4 na Aralin — Mga Sagot

Ang hinihingi ng araling ito'y 26 na bagay na impormasyon (pati ang sarili mong tugon at mga iginuhit sa memorya). Napakahusay ang antas kung 24 hanggang 26 ang tamang sagot; mabuti, 20 hanggang 23; 14-19, katamtaman. Kung mababa sa 14 ang tama basahin mo uli ang aralin.

1. a) Siya ay "Anak ni Adan," tunay na tao, kinatawan ng sangkatauhan.
2. a) Siya'y isinilang ni Maria, isang dalaga, at ang Diyos ang Kanyang Ama.  
d) Inilakip sa Kanyang likas na banal ang likas ng tao.
3. a) Katawan at katangian ng isang tao; b) Kalagayan ng buhay sa gitna ng mga tao; k) Kakayahang ispiritwal para sa lahat.
4. (Tingnan sa pahina 70 ang orihinal)
5. b) Tinanggihan Niya ang tukso at patuloy na gumawa ng mabuti.
6. Pareho. Tumanggi Siyang magkasala (negatibo) at ginawa yaong tama (positibo)
8. Kapahayagan, paghahanda, pagpalit, pamamagitan.
9. e) Lahat ng nabanggit sa itaas nito.
11. Ang iyong tugon.
12. a) pinababa kaysa mga anghel  
b) si Jesus ay namatay para sa ating lahat, upang makapagdala ng marami sa kaluwalhatian.  
k) tao  
d) sa pamamagitan ng Kanyang kamatayan ay maigupo Niya ang diyablo. Sa gayon, pinalaya Niya ang lahat ng naging alipin habang panahon dahil sa kanilang takot sa kamatayan.
14. a-3; b-5; k-1; d-2; e-4.
15. Tingnan ang pahina 81.

Bilang ng mga tamang sagot . . . . . Antas . . . . .